

第二〇七册

方輿彙編

山川典

洞庭湖部

(卷)

青草湖部

澧水部

沱水部

澧

水部

辰水部

沅水部

沅

宋水部

愚溪部

濂溪部

濂

潛水部

涪水部

梓潼江部

青

衣水部

劍津部

劍

九鯉湖部

曲江部

灕江部

灕

湘水部

西洱海部

西

昆明池部

西洱海部

西

金沙江部

養龍坑部

黑水部

黑

海部

養龍坑部

黑水部

黑

古今圖書集成

中華書局影印

欽定古今圖書集成方輿彙編山川典

第二百九十八卷目錄

洞庭湖部彙考

考

洞庭湖部藝文一

洞庭賦

宋夏侯嘉正

遊岳陽洞庭記

明高對

洞庭賦

廖道南

洞庭湖部藝文二

詩詞

洞庭湖

唐宋之問

遊洞庭湖二首

張說

泛洞庭

前人

送梁六自洞庭山作

前人

望洞庭湖贈張丞相

孟浩然

洞庭寄閻九

前人

洞庭湖

李白

九日登巴陵望洞庭

前人

陪族叔刑部侍郎曄及中書賈舍人至遊洞庭湖五首

前人

秋登巴陵望洞庭

前人

陪侍郎叔遊洞庭醉後三首

前人

初至襄陽巴陵與李十二白裴九同泛洞庭湖三首

賈至

洞庭送李十二赴零陵

前人

巴陵早春

前人

過洞庭湖

杜甫

過洞庭湖

前人

過南嶽入洞庭湖

前人

登岳陽樓

前人

陪裴使君登岳陽樓

前人

洞庭秋月行

劉禹錫

初至洞庭懷瀟陵別業

劉長卿

岳陽館中望洞庭湖

前人

杪秋洞庭中懷亡道士謝太虛

前人

洞庭湖

韓愈

送李礎判官歸湖南

前人

登岳陽樓

前人

洞庭湖

曹松

洞庭冬夜聞笛

李義壯

洞庭玩月

韓偓

秋晚過洞庭

張泌

洞庭風雨

李羣玉

洞庭

前人

洞庭

許棠

過洞庭

前人

秋宿洞庭

周賀

洞庭言懷

譚用之

過洞庭

李嶼

岳陽晚望

崔珣

題岳陽樓

白居易

和友人憶洞庭舊居

劉滄

登岳陽樓

麻溫其

送劉山人歸洞庭

李頻

過洞庭湖

張喬

洞庭南館

張祐

過洞庭

朱慶餘

春晚岳陽樓言懷二首

崔魯

夜過洞庭

殷堯藩

洞庭

胡曾

秋日登岳陽樓晴望

張碧

洞庭野望

宋陳與義

連日風作洞庭不可渡出赤沙湖

范成大

洞庭湖

劉子澄

洞庭秋望

元吳奎

送鄭同夫歸豫章分題得洞庭湖

顧瑛

洞庭秋月

揭傒斯

前題

陳旅

過洞庭

唐珙

洞庭春興

明楊慎

洞庭秋月

夏元吉

前題

唐寅

過洞庭湖

馮世雍

送客遊洞庭湖

謝榛

洞庭湖中作

李東陽

洞庭秋月

黎擴

雨中過洞庭

王偁

過洞庭賦得湖南清絕地

譚元春

登岳陽樓

汪濂

洞庭阻風

許夢熊

洞庭秋月

無名氏

浪淘沙

以上詞

浪淘沙

以上詩

洞庭湖部選句
洞庭湖部紀事
洞庭湖部雜錄
洞庭湖部外編

山川典第二百九十八卷

洞庭湖部彙考

巴陵之洞庭湖

洞庭湖在今湖廣境內東北屬岳州府西南屬常德府吞赤沙連青草橫互七八百里合沅漸元辰敘西澧資湘九水俱匯于此日月若出沒于其中浩浩蕩蕩真宇內大觀也

考

按書經夏書禹貢荆及衡陽惟荊州江漢朝宗于海九江孔殷沱潛既道傳江於此州界分爲九道甚得地勢之中潯陽地記云一日烏白江二日蚌江三日烏江四日嘉靡江五日畎江六日源江七日廩江八日提江九日箇江張須元緣江圖云一日三里江二日五州江三日嘉靡江四日烏土江五日白蚌江六日白鳥江七日箇江八日沙提江九日廩江參差隨水長短或百里或五十里始于鄂陵終于江口會于桑落洲太康地記曰九江劉歆以爲湖漢九水入彭蠡澤也說傳以江是此水大名九江謂大江分而爲

九猶大河分爲九河故言江於此州之界分爲九道訓孔爲甚殷爲中言甚得地勢之中也鄭云殷猶多也九江從山谿所出其孔衆多言治之難也地理志九江在今廬江潯陽縣南皆東合爲大江如鄭此意九江各自別源非大江也下流合于大江耳然則江以南水無大小俗人皆呼爲江或從江分出或從外合來故孔鄭各爲別解非九江卽今之洞庭也水經言九江在長沙下雋西北楚地記曰巴陵瀟湘之淵在九江之間今岳州巴陵縣卽楚之巴陵漢之下雋也洞庭正在其西北則洞庭之爲九江審矣今沅水漸水沅水辰水敘水酉水澧水資水湘水皆合于洞庭意以是名九江也孔甚殷正也九江水道甚得其正也按漢志九江在廬江郡之潯陽縣潯陽記九江之名一日烏江二日蚌江三日烏白江四日嘉靡江五日畎江六日源江七日廩江八日提江九日箇江今詳漢九江郡之潯陽乃禹貢揚州之境而唐孔氏又以爲九江之名起于近代未足爲據且九江派別取之邪亦必首尾長短大略均布然後可目之爲九然其一水之間當有一洲九江之間沙水相間乃爲十有七道而今潯陽之地將無所容况沙洲出沒其勢不常果可以爲地理之定名乎設使派別爲九則當日九江既道不應曰孔殷於導江當日播九江不應曰過九江反覆參考則九江非潯陽明甚本朝胡氏以洞庭爲九江者得之會氏亦謂導江曰過九江至于東陵東陵今之巴陵今巴陵之上卽洞庭也因九水所合遂名九江故下文導水曰過九江經之例大水合小水謂之過則洞庭之爲九江益以明矣全

新安陳氏曰江漢朝宗于海卽繼曰九江孔殷導江不曰播九江而曰過九江則大江自大江九江自九江可見孔氏所謂江于此分爲九道者其非明矣證以導江東至于澧過九江至于東陵則九江當在澧州之下巴陵之上而不在潯陽與今之江州尤明矣朱蔡以洞庭湖當之辨証詳明從之可也謂江南凡水皆呼爲江禹時澧州之下巴陵之上自有九水今年代久遠陵谷變遷不可以今水証古水而闕之亦可也
按山海經海內東經湘水出舜葬東南陬西環之入洞庭下一日東南西澤註洞庭在長沙巴陵今吳縣南山下有洞庭穴道潛行水底云無所不通號爲地脈
沅水出象郡鐔城西入下雋西合洞庭中
按水經湘水注湘水左逕鹿角山東右逕謹亭戍西又北合查浦又北得萬浦咸湘浦也側湘浦北有萬石戍湘水左則沅水注之謂之橫房口東對微湖世或謂之麋湖口也右屬微水卽經所謂微水經下雋者也西流注于江謂之麋湖口也水又北逕金浦戍北帶金浦水湖澹也湘水左則澧水注之世謂之武陵江凡此四水同注洞庭北北會大江名之五渚戰國策曰秦與荆戰大破之取洞庭五渚也湖水廣圓五百餘里日月若出沒于其中山海經云洞庭之山帝之二女居焉沅澧之風交湘之浦出入多飄風暴雨湖中有君山編山君山有石穴潛通吳之包山郭景純所謂巴陵地道者也是山湘君之所遊處故曰君山矣昔秦始皇遣風于此而問其故博士曰湘君

出入則多風秦王乃藉其山漢武帝亦登之射蛟于是山東北對編山山多篋竹兩山相次去數十里迴峙相望孤影若浮湖之右岸有山世謂之笛鳥頭石石北右會翁湖口水上承翁湖左合洞浦所謂三苗之國左洞庭者也

按長沙志洞庭之水潛七百里在岳州城西

按南遷錄岳州洞庭西岸有沙洲堆阜隆處即青草廟廟下一湖之內中有此洲南名青草北名洞庭所謂重湖也

按岳陽風土記樂史言大江在巴陵東北流入洞庭今洞庭水會于江非江流入洞庭也荆江出巴蜀自高注下濁流洶湧夏秋暴漲則逆泛洞庭瀟湘清流頓皆混濁岳人謂之翻流水南至青草湖或三五日乃還俗云水神朝君山

按述異記洞庭湖中有釣洲昔范蠡乘扁舟至此遇風止釣于洲上刻石記焉有一陂陂中有范蠡魚昔范蠡得大魚烹食之小者放於陂中陂邊有范蠡石牀石硯鉗餅范蠡宅在湖中

按唐書地理志岳州巴陵郡巴陵有洞庭山在洞庭湖中

按北夢瑣言湘江北流至岳陽逢蜀江夏涼後蜀漲勢高遏住湘波讓而退溢為洞庭湖凡闊數百里而君山宛在水中秋水歸壑此山復居于陸唯一條湘川而已海為桑田于斯驗也

按地理通釋十道山川攷洞庭湖在岳州巴陵縣西南一里五十步與青草湖相連青草在南洞庭在北洞庭大湖也廣圓五百餘里日月若出沒于其中中

有君山在縣西三十里青草湖中莊子黃帝張咸池之樂于洞庭之野楚辭遭吾道兮洞庭註資水沅水澧水湘水同注洞庭北會大江名五渚戰國策秦與荆戰大破之取洞庭五渚謂此也薛氏曰洞庭即巴丘也合沅湘諸水至岳州巴陵縣入江

按方輿勝覽湖北路岳州洞庭湖在巴陵縣西西吞赤沙南連青草橫亘七八百里日月若出沒于其中風土記鼎澧沅湘合諸蠻黔南之水匯于洞庭至巴陵與荆江合

按岳州府志洞庭湖在郡城西南禹貢九江孔殷謂沅漸元辰敘西澧資湘九水會于此故名九江中沅澧湘最大沅發自牂牁經辰溪合麻陽諸溪洞水過常武出湖之北湘發自廣西興安海陽山至永州合瀟水汨羅過長沙出湖之南澧發自武陵古充縣東流過武水口合焦溪茹溪諸水經慈石澧出湖之西每夏岷峩雪消荆江暴漲三江水壅匯為洞庭連亘七八百里秋水歸壑則洲渚畢見洞庭又名五瀟水經云湖水右會小青口資水即今益陽江右則沅水注之今橫房口東則微湖今慶湖西流注為江樂湖口左則澧水今武陵江此五水注洞庭會大江故曰五瀟青草湖一名巴丘湖一名重湖在洞庭之西與華容接壤舊志謂在洞庭南者非也風土記云夏秋水泛與洞庭為一水涸則此湖先乾青草生焉杜甫詩洞庭猶在目青草續為名赤沙湖在西又有雲夢湖皆與洞庭為一

按巴陵縣志君山在縣西十五里洞庭湖中響山在君山上一曰鳴山荆州記云君山上有穴潛

方輿彙編山川典第二百九十八卷洞庭湖部

通吳之包山

編山在縣南五里既筆山西下瞰洞庭與君山對峙孤影若浮湘人以吳舟為編山形似焉故名上有神人跡下有龍窟舊有洞庭君祠

既筆山在縣西南七里濱洞庭以形似名

鹿角山在縣南六十里洞庭湖濱

大江從荊州石首北流至縣西北城陵磯合洞庭諸水

閣子湖在縣東南二十里即角子湖也以在洞庭之角故名

新牆湖在縣南六十里發源相思山至灌口注洞庭南津港在縣南二里通洞庭為泊舟處

秦皇井風土記云洞庭之岸有二石井相去數百步俗號秦皇井

金沙洲在洞庭湖中

平江縣汨水一曰汨水一曰吳昌水即今縣南江也水經云汨水出豫章艾縣桓山西南經吳昌縣又西經汨羅成西南與羅水合經磊石入洞庭

華容縣紫港湖在章華臺側上通青湖下接縣港遂進于洞庭宋謂之私港

沅水會赤沙注洞庭之水謂之澧口沅水注于洞庭謂之鼎江口

澧州澧水在州南三里源出武陵充縣西歷山東流至石門縣今澧水合流達澧城下會澧澧二水入洞庭

涿水在州北七十里源出龍潭洞會澧水入洞庭

安鄉縣鼎江渡在縣東北四十里岳陽風土記澧水

會沅然後入湖今澧沅雖相通然澧水注于洞庭謂澧口沅水注于洞庭謂鼎江口歲月既久誤呼景港云爾

按常德府志龍陽縣洞庭湖在縣東一百六十里跨沅江界山海經曰洞庭乃沅澧之交瀟湘之源九江之口禹貢九江孔殷註云即今之洞庭也沅漸元辰敘西澧資湘九水皆合于此而沅資湘三水為最大皆自南而入于湖岳州則荆江自北而過每歲夏秋之交湖水泛溢方八九百里龍陽沅江則西南之一隅耳一名青草湖其相連諸湖唯此獨大則洞庭亦其總名也

洞庭夾在縣東一百二十里洞庭湖濱往來舟楫候風之所

天心湖在縣東南六十里有上下天心東連洞庭太白湖在縣東八十里東北入洞庭湖西南會天心湖達安樂湖入大江

團山在縣東北六十里洞庭湖之中

大圍堤在縣北周迴三萬五千八百餘丈一百二十里上接沅辰諸溪洞水下瀆洞庭大湖

沅江縣洞庭湖在縣東北百里其湖跨澧岳相陰界山海經云洞庭乃沅澧之交瀟湘之淵去縣七十里為洞庭矣

赤山在縣東北五十里為洞庭右翼高聳雲霄綿亙數十里

芷江在縣西南瀟湘分派逆行數十里北會鼎水入于洞庭

按荊州府志石首縣西湖口在縣西六十里抵安鄉

界西通洞庭故名

焦山港在縣東六十里通洞庭以山得名

彭田港在列貨山水泛通洞庭

監利縣白螺山在縣東一百四十里細石磷磷突起平地上接洞庭下俯小沙淇湖

按長沙府志湘陰縣三十六灣水在縣南本湘江北流至縣門逕江口乃分一派東流為三十六折一派北流由陵子口出合洞庭

寧鄉縣平江在縣南五十里出金盤山流二十里跋石江又二十五里會于潭流入洞庭

按江西通志九江府潯陽江在府城西北源自岷山帶洞庭九水合流至此遠郡城而下四十里合彭蠡湖水東流入海

洞庭湖部藝文一

洞庭賦

宋夏侯嘉正

楚之南有水曰洞庭環帶五郡森不知其幾百里臣乙酉夏使岳陽抵湖上思構賦明日披襟而觀之則翼然動促然鼓懷然駭愕然殆恍若駕春雲而軼霓浩若浮汗漫而朝躋退若據泰山之安進若履千仞之危惜若無識烟若通微跛若不倚踰若將馳耳不及掩目不暇移情悻悻心嬉二三日而後神始宅氣始正若此不敢以賦為事者二年然眷眷不已一日登

崇丘望大澤有雲萃兮與歎今止與止未嘗忽若有遇由是漬陽輝沐芳澤觀一異人于巖之際霞為裾雲為袂冰膚雪肌金環玉珮浮丘羨門斯實其對因言曰若非好辭者耶臣曰然然則若智有所不通識有所不窮用不遁不窮而循乎無端之紀若得無殆乎臣又曰然然志極則物應思精則道通嘉若之勤無譁談吾為若稱云太極之生曰地曰天中合五精五精之用而水居一焉水之疏邇則為江分遠則為河積則為潞今總則為湖若今所謂洞庭者傑立而孤廓然其無區其大無徒含陽字陰元神之都暖曖昧昧百川不敢逾有若神者有若賓者有若僕者有若子者有若附庸者有若婢奴者若禹會塗山武巡牧野千同百會紛處麾下每六合澄靜中流迴睨莽莽蒼蒼纖霄不翳太陽望舒出沒其間萬頃咸沸疆而名之為巨澤為長川為水府為大淵縱之不踰弱之不卑乍若賢人以自重持誘之不前犯之愈堅又若良將以謀守漫彭彭潏潏渾渾浩爾一致又若太始未有名義沖沖漠漠二氣交錯又若混沌凝然未鑿此乃方輿之心胃溟海之郭郭也三代之前其氣滂落浩浩滔天與物週薄滅木襄陵無際無廓上帝降鑒巨人斯作乃命元夷授禹之機隄山湮谷滌源暢微然後若金在鎔若木在工流精成器夫何不通是澤之設允執厥中既異其性遂得其正有升有降有動有靜臣應之曰升降動靜可得聞乎神曰水之性非圓非方非柔非剛非直非曲非元非黃劃象為坎本乎義皇外婉而固內健而彰降以姤始升以復張其靜處陰其動隨陽六府之甲萬化之綱式觀是澤乃

知天常若乃四序之變九夏收處烘然而炎沸然而
煮羣物涸洞燦為隆暑澤之作頎然其容若去若往
若茹若吐靈趨怪觀杳不可親蒸之為雲散之為雨
倏忽萬象如還太古真可嘉也若乃秋之為神素氣
清泚肅肅脩脩羣嶺四起澤之動動然其姿若挺若
倚若行若止異宮離離為之騰風蒼梧崇崇為之供

雲四顧一色黯然氤氲其聲瀾瀾若商非商若徵非
徵東溟海門一浪五千里又足畏也言其狀則石然
而骨岸然而草蒸然而榮澤然而脈有山而心有洞
而腹有玉而體有珠而目穹鼻孤島呀口萬谷臂帶
三吳足跬荆巫或跂然而望或翼然而趨彭蠡震澤
詎可云乎臣又問曰澤之態已聞命矣水之族將何
如居神曰大道變易或文或質沉潛自遂其類非一
或被甲而遭或曳裾而什或禿而跋或角而蛻或吞
而呀或哇而牙或心以之懈或目以之暇或修臂而
立或橫驚而疾或髮於首或髯於肘或儼而莊或毅
而黝彪彪玢玢若太虛之含萬彙各循其生而合乎
羣者也臣又問曰若神之資其品何如也神曰清矣
靜矣麗矣至矣邈難知矣肇于古古有所未達形于
今今有所未察非希非夷合其心於自然然後上天
入地三根六元水居陸處夫何不燭彼鯉之賢
轡龍之仙乃吾之肩也其餘海若天吳陽侯神胥
鯀而遊會不我儔臣又問曰易稱王公設險是澤之
險可以為固而歷代與衰其義安取神曰天道以順
不以逆地道以謙不以盈故治理之世建仁為旌聚
心為城而孤不假弦牙不假鋒四海以之而大同何
必特險阻何必據要衝若秦得百一為帝齊得十二

為王其山為金其水為湯守之不義歟然而亡水不
在大特之者敗水不在微怙之者危若漢疲于昆明
桀困于酒池亦其類也故黃帝張樂而興三苗棄義
而傾則知洞庭之波以仁不以亂以道不以賊惟賢
者觀之而後得也于是盤桓徙倚凝精流視聲以辭
對條然而晦

遊岳陽洞庭記

明高軒

余家食時夢登方舟正舉帆長往忽驚濤怒浪停泊
柳港遙見江城層樓丹崖翠壁臨大江之濱少焉風
恬浪靜舟始安流覺來莫知其端嘉靖甲辰余應南
陽守丙午謫鄭州判戊申移巴陵令舟由荆南順流
而下洞庭長江風作維縵磯石岳陽樓君山俱在望
宛然昔年夢中景乃嘆曰余今日謫移固前定矣蓋
巴陵之勝惟在洞庭一湖按禹貢九江孔殷即此湖
水沅漸元辰敘西澧資湘皆匯流洋溢五瀦周廻八
百餘里浩浩湯湯一碧萬頃月印之而著象風遭之
而成文殆與芝城之彭蠡姑蘇之震澤金斗之巢焦
武陵之西湖同一汪瀾也夫洞庭固極三楚之勝岳
陽樓枕巴丘瞰洞庭延庚挹辛縹緲崢嶸乎大觀
不特君山咫尺擁浮湖南有祝融北有內方東有
黃鶴西有大龍環列拱屹皆在指顧間始與豫章之
滕閣宣城之疊嶂武昌之黃鶴黃岡之竹樓同一壯
麗也夫岳陽固據洞庭之勝建始莫詳唐開元間張
說謫守是邦登臨賦詩自爾名重觀其誰念三千里
江潭一老翁之句則其懷抱可知矣說子均李杜韓
孟白賈諸名賢皆有題詠樓與湖山名益重于世宋
慶曆間滕子京亦謫于斯作新厥樓屬范希文為記

所謂先天下之憂而憂後天下之樂而樂者其寓意
深矣昔柳宗元謫柳永凡所經之處皆以詞章品題
為佳山水文正公三代以上人物宗諒獲此嘉記華
此傑樓更偉觀數重迴出湖山外豈止一丘一壑一
水一石云乎哉當時以滕樓范記蘇書邵篆為四絕
而未叔特寄詩謂其逸思遺文良有以也日後蒞斯
者率多遷謫凡所歌詠類皆悽惋此固江湖之遠既
有以感發羈旅情惻而鬱陶之衷亦藉乎風景而因
言以宣也耶余每登樓感今慨古舉目蕭然自不能
已乎去國懷鄉憂議畏議之念也按山海經洞庭之
山帝二女居之為湘君因以名山本靜凡欲登者若
先形諸擬議輒烈風雷雨多不果是年中秋余公暇
乘舟獨往是日也晴空不雲澄江不波既泊岸回瞻
岳樓恍若蓬萊隔弱水然湖水浮山入山則視之不
見異哉崇阿平阜沃野極百里之遠茂林方竹藤蘿
繞諸利之上山之鳴鏗然有聲聞馥郁之香莫知其
處道書以此為十二福地其形如扁其狀如十二螺
髻李太白詩淡掃明湖開玉鏡丹青畫出是君山劉
禹錫詩遙望洞庭山擁翠白雲盤裏一青螺是已唐
諫議韓注直忤貶岳適意遊君山杜工部寄以濯足
洞庭望八荒之詩何其雄哉及觀湘中老人之歌東
坡謂必謫仙通世者所為似亦確論也若夫山有臺
名軒轅相傳黃帝即此鑄鼎鼎成騎龍上昇秦始皇
南遊浮江阻風問湘君何神博士以婬女舜妃對怒
楮其山二說似幻誕匪經至于柳毅傳溷陽婦書與
洞庭水君宴碧雲宮九涉荒唐殊未足信岳武穆伐
君山木造巨筏塞港汊擒洞庭寇楊公厥功尚可紀

設余遍歷茲山之景暮煙旣凝暮鴉旣棲可以詠歸矣登舟乃還月明如畫中流浩歌仍向岳陽樓下泊焉

洞庭賦 有序 廖道南

夫靈飛之曲神人所詠歌也白雲之謠僊姥所贈遺也宣元機于古調世天巧于元聲傳永優柔溫醇暉綫是以黃鳥嚶嚶伐木之義典焉白駒皎皎束芻之愛形焉適若洞庭君戴切雲之冠翳承日之華窮深致遠極幽析微舉典午之三謝陋建安之七子脫其近習超于太始庶斯文有托吾道不孤也已其辭曰

善天地之渾靈兮先五行而乘氣機列津漢于塵舍今騰霖霖而滋濡迺潤下其滌盪兮象左旋而東注莽困遠之果滯兮西大海乎天之宇繫君子之體物分習重坎而需兌澤漸咸池之決瀝而滴渤兮潏潏之涸清羨五湖之浸具區兮揚靈乎三江而權之震澤滂盪其濛濛兮洞庭渚渚以神倪望岸專之建霞標兮客穹隆之空翠峯縹緲而噴吼兮瀆冠練其渙萃泉白雲之繞繞兮洲明月乎余將征狎鷗鳥于前汀兮鳴朱雁而嘯元鯨驅河伯使負舟兮叱陽侯使同楫江妃海童絡繹于後先兮萬靈晶晶其制矚擊扶桑之翹英兮萬建木其如雲吸陽精之沆瀣兮瑤膏玉蕊礫礫而續紛友偃佺于元圃兮招馬師皇于流洲謁東方君子于陽谷兮駕應龍其蚺鰐乃辭閭闔之貝闕兮抗軒轅之瑤旃曳芙蓉之霞裾兮舞羣鶴而遊釣天招太一于紫宮兮臥都房以終日寂闕寥寥其緬藐兮吻不知予之所極重日造化莽眇

吾何求萬形生滅奚可留往者傳舍來綴旒俟河之清祇增憂東方煌煌三五收日中見斗河漢流終風且霾啼鵲鳳凰竄伏陰巖幽我歌洞庭阻且修君子崇德令名悠于胥樂兮爲好仇

洞庭湖部藝文二 詩詞

洞庭湖 唐宋之間

地盡天水合朝及洞庭湖初日當中涌莫辨東西隅晶耀目何在澄澈心欲無靈光晏海若游氣耿天樞張樂軒皇至征苗夏禹祖楚臣悲落葉堯女泣蒼梧野積九江潤山通五嶽圖風恬魚自躍雲夕鴈相呼獨此臨汎漾浩將人代殊末言洗氛濁卒歲爲清娛要使功成退徒勞越大夫

遊洞庭湖 張說

平湖曉望分仙嶠氣氤氲鼓枻乘清渚尋峰弄白雲江寒天一色日靜水重紋樹坐參猿嘯沙行人鷺羣綠源斑篠密挂徑綠蘿紛洞穴傳虛應楓林覺自薰雙童有靈藥願取獻明君

又

緬邈洞庭岫蒼水暮色冠在太湖中可望不可即剖竹守窮渚開門對奇域城池自籠密縹緲爲微繁靡日不思往經時始願飛飛棹越浪浪維舟恣攀陟竚窺入雲步崎嶇倚松息巖壇有鶴過壁宇無人識

滴石香乳溜垂崖靈草植玩幽輕霧阻討異忘矚逼寒沙際水平霜樹籠烟直空宮開莫覩地道窺難測此處學金丹何人生羽翼誰傳九光要發拜三僊職紫氣徒想像清談長渺默寬裳若有來觀我雲峯側

泛洞庭 前人

平湖一望水連天林景千尋下洞泉忽驚水上光華滿疑是乘舟到日邊

送梁六自洞庭山作 前人

巴陵一望洞庭秋日見孤峰水上浮聞道神仙不可接心隨湖水共悠悠

望洞庭湖贈張丞相 孟浩然

八月湖水平涵虛混太清氣蒸雲夢澤波撼岳陽城欲濟無舟楫端居恥聖明坐觀垂釣者徒有羨魚情

洞庭寄閻九 前人

洞庭秋正闊余欲泛歸船莫辨荆吳地唯餘水共天渺瀰江樹沒含香海潮連遲爾爲舟楫相將濟巨川

洞庭湖 李白

日晚湘水綠孤舟無端倪明湖漲秋月獨泛巴陵西遇慙裴逸人巖居凌丹梯抱琴出深竹爲我彈鸚鵡曲盡酒亦傾北窻醉如泥人生且行樂何必組與圭

九日登巴陵望洞庭 前人

九日天氣清登高無秋雲造化闢川岳了然楚漢分長風鼓橫波六合聲龍文憶昔傳遊豫樓船壯橫汾今茲討鯨鯢旌旆何續紛白羽落酒樽洞庭羅二軍黃花不撥手戰鼓遙聞劍舞轉頻頻陽當時日停驂酣歌激壯士可以摧妖氛醞醞東籬下淵明不足羣陪族叔刑部侍郎曄及中書賈舍人至遊洞庭

五首

前人

洞庭西望楚江分水盡南天不見雲日落長沙秋色遠不知何處弔湘君

其二

南湖秋水夜無烟耐可乘流直上天且就洞庭賒月色將船買酒白雲邊

其三

洛陽才子謫湘川元禮同舟月下仙記得長安還欲笑不知何處是西天

其四

洞庭湖西秋月輝瀟湘江北早鴻飛醉客滿船歌白苧不知霜落入秋衣

其五

帝子瀟湘去不還空餘青草洞庭間淡掃明湖開玉鏡丹青畫出是君山

秋登巴陵望洞庭

前人

清晨登巴陵周覽無不極明湖映天光徹底見秋色秋色何蒼然際海俱澄鮮山青滅遠樹水綠無寒煙

來帆出江中去鳥向日邊風清長沙浦霜空雲夢田

瞻光惜頽髮聞水悲徂年北渚既蕩漾東流自潺湲

野人唱白雪越女歌採蓮聽此更腸斷憑崖淚如泉

陪侍郎叔遊洞庭醉後三首

前人

今日竹林宴我家賢侍郎三杯容小阮醉後發清狂

其二

船上齊燒樂湖心泛月歸白鷗閑不去爭拂酒筵飛

其三

剗却君山好平浦湘水流巴陵無限酒醉殺洞庭秋

初至襄陽巴陵與李十二白裴九同泛洞庭湖三首 賈至

江上相逢皆舊遊湘山末望不堪愁明月秋風洞庭水孤鴻落葉一扁舟

其二

楓岸紛紛落葉多洞庭秋水晚來波乘興輕舟無近遠白雲明月弔湘娥

其三

江畔楓葉初帶霜渚邊菊花亦已黃輕舟落日興不盡三湘五湖意何長

洞庭送李十二赴零陵

前人

今日相逢落葉前洞庭秋水遠連天共說金華舊遊處回看北斗欲潸然

巴陵早春

前人

謫君瀟湘渚再見洞庭秋極目連江漢西南浸斗牛滔滔盡雲夢澹澹搖巴丘曠如臨瀚海宵疑造瀛洲

君山麗中波蒼翠長夜浮帝子去未久楚詞尚悲秋

我同長沙行時事加百憂登高望舊國戎馬滿東周

宛葉遍蓬蒿樊鄧無良嘯獨攀青楓樹淚灑滄江流

故人西掖寮同扈岐陽蒐差池盡三黜贈賂各南州

相去雖地近不得從之遊耿耿雲陽臺迢迢王粲樓

歧予暮懷裏誰謂無輕舟

過洞庭湖

杜甫

蛟室圍青草龍堆擁白沙護堤盤古木迎棹舞神鴉破浪南風正回棹畏日斜湖光與天遠直欲汎仙槎

過南嶽入洞庭湖

前人

洪波忽爭道岸轉異江湖鄂渚分雲樹衡山引舳艫

翠牙穿莫漿碧節上寒蒲病渴身何去春生力更無壤童羣雨雪漁屋架泥塗側風帆滿微冥水驛孤悠悠迴赤壁浩浩略蒼梧帝子留遺恨曹公屈壯圖聖朝光御極殘孽駐艱虞才淑隨斷養名賢隱鍛爐卻平元入漢張翰後歸吳莫怪啼痕數危橋逐夜鳥

登岳陽樓

前人

昔聞洞庭水今上岳陽樓吳楚東南坼乾坤日夜浮親朋無一字老病有孤舟戎馬關山隔憑高涕泗流

陪裴使君登岳陽樓

前人

湖闊兼雲霧樓孤屬晚晴禮加徐孺子詩接謝宣城雪岸叢梅發春泥百草生敢違漁父問從此更南征

洞庭秋月行

劉禹錫

洞庭秋月生湖心層波萬頃如鎔金孤輪徐轉光不定遊氣濛濛隔寒鏡是時白露三秋中湖平月上天地空岳陽城頭暮角絕蕩漾已過君山東城頭蒼蒼夜寂寂水月遙遙遠城白蕩漿巴童歌竹枝連櫓估客吹羌笛勢高夜久陰力全爽氣肅肅開清輝浮雲夜烏啼四裔遙望星斗當中天天天鷄相呼曙霞出飲影含光讓朝日日出喧喧人不聞夜來清景非人間

初至洞庭懷瀟湘別業

劉長卿

長安遯千里月夕懷雙闕已是洞庭人猶看瀟湘月誰堪去鄉意親戚想天未昨夜夢中歸烟波覺來關江臯見芳草孤客心欲絕豈訝青春來但傷經時別

岳陽館中望洞庭湖

前人

萬古巴丘戌平湖北望長問人何森森愁暮更蒼蒼疊浪浮元氣中流沒太陽孤舟有歸客早晚還瀟湘

杪秋洞庭中懷亡道士謝太虛 前人

漂泊日復日洞庭今更秋風清亦何意此夜催人愁
惆悵客中月徘徊江上樓心如楚天遠目送滄波流
羽客久已沒微言無處求空餘白雲在客與隨孤舟
千里杳難望一身常獨遊故園復何許江海徒淹留

洞庭湖 韓愈

十月陰氣盛北風無時休蒼茫洞庭岸與子相繼舟
霧雨晦爭泄波濤怒相投鷄犬斷四聽糧絕誰與謀
相去不容步險如礙山丘清談可以飽夢想接無由
男女喧左右啼飢但啾啾非懷北歸與何用勝羈愁
雲外有白日寒光自悠悠能令暫開霽過是吾無求

送李礎判官歸湖南 前人

長沙入楚深洞庭值秋晚人隨鴻雁少江共蒹葭遠
歷歷余所經悠悠子當返孤遊懷耿介旅宿夢婉婉
風土稍殊音魚蝦日異飯親交俱在此誰與同息偃

登岳陽樓 前人

洞庭九州間厥大誰與讓南匯羣崖水北注何奔放
潞爲七百里吞納各殊狀自古澄不清環混無歸嚮
炎風日搜攪幽怪多冗長軒然大波起宇宙溢而暢

巍哉拔蒿華騰躍較健壯聲音一何宏轟礚車萬兩
猶疑帝軒轅張樂就空曠蛟螭露筍簞綸練吹組帳
鬼神非人世節奏頌跌蕩陽施見夸麗陰閉咸悽愴

朝迴宜春口極地缺隄障夜繞巴陵州叢芮纔可傍
星河盡涵泳俯仰迷下上餘瀾怒不已喧聒鳴壘盞
明登岳陽樓輝煥朝日亮飛廉戢其威清晏息纖纈

泓澄湛凝綠物影巧相况江豚時出戲驚波忽蕩漾

洞庭湖 曹松

東西南北各連空波上唯留小朵峰長與岳陽鼙鼓
角不離雲夢轉魚龍吸迴日月過千頃鋪盡星河刺
一重直到劫餘還作陸是時應有羽人逢

洞庭夜夜聞笛 李義壯

湖水茫茫冬月白三年夜半孤舟客一回見月一沾
中湖上何人復吹笛橫笛能令孤客悲况復天空歲
晏時羽音割疾商音切湖波激盪湖雲遲暮斷湘娥
擘斑竹嚴霜漚漚飛寒玉巴童折柳更鈴娟無數飄
花滿洞庭魚龍寂寞鴻鴈杳惟餘一點君山青明日
別離向何許渡口一聲淚如雨

洞庭玩月 韓偓

洞庭湖上清秋月月皎湖寬萬頃霜玉枕深沉潭底
白金杯細碎浪頭光寒驚鳥鵲離巢噪冷射蛟螭換
窟藏更憶瑤臺逢此夜水晶宮殿挹瓊漿

秋晚過洞庭 張泌

征帆高掛酒初酣暮景離情雨不堪千里晚霞雲夢
北一洲霜橘洞庭南溪風送雨過秋寺澗石驚龍落
夜潭漫把羈魂弔湘魂九疑愁絕煙鎖嵐

洞庭風雨 李羣玉

巨浸吞湘澧西風忽怒號水將天共黑雲與浪爭高
羽化思乘鯉山漂欲拜鰲陽鳥猶曝翅真恐濕桃桃

洞庭 前人

楚色籠秋草秋風洗洞庭久霏生水寺初月落雲汀
棹響來空闊漁歌去杳冥欲浮闌下艇一到斗牛津

洞庭 許棠

驚波常不定半日鬢堪斑四顧疑無地中流忽有山
鳥高常畏帆帆遠却如聞漁父前相引時歌浩渺間

過洞庭 前人

空江浩汗景蕭然盡日孤蒲泊釣船青草浪高三月
渡綠楊花撲一溪煙情多莫舉傷春日愁極緣無買
酒錢猶有漁人數家住不成村落夕陽邊

秋宿洞庭 周賀

洞庭初下葉旅客不勝愁明月天涯夜青山江上秋
一官成白首萬里寄滄洲只被浮名繫寧無愧海鷗

洞庭言懷 譚用之

江上陰雲鎖夢魂江邊深夜舞劉琨秋風萬里芙蓉
國暮雨千家薜荔村鄉思不堪悲橘柚旅途誰肯念
王孫漁人相見不相問長笛一聲歸島門

過洞庭 李嶼

浩渺注橫流千潭合萬湫半洪侵楚翼一汊屬吳頭
動軸當新霽漫空正仲秋勢翻荆口泊聲擁岳陽浮
遠霧滋衡岳微涼散橘洲星辰連影動風翠逐隅收

岳陽晚望 崔珣

乾坤千里水雲間釣艇如萍去復還樓上北風斜捲
席湖中西日倒銜山懷沙有恨騷人往鼓瑟無聲帝
子閒何事黃昏尚凝睇數行煙樹接荆蠻

題岳陽樓 白居易

岳陽樓下水漫漫獨上危樓凭曲欄春岸綠時連夢
澤夕陽紅處近長安猿攀樹立啼何苦雁點湖飛渡
亦難此地唯堪畫圖障華堂張與貴人看

和友人憶洞庭舊居 劉滄

客舍經時益苦吟洞庭猶憶在前林青山殘月有歸
鳥

夢碧落片雲生遠心溪路烟開江月出草堂門掩海
濤深因君話舊起愁思隔水數聲何處砧

登岳陽樓

麻溫其

湖邊景物屬秋天樓上風光似去年僊侶緣生留福
地湘娥帝子寄哀絃雲門自繞軒臺外木葉偏飛楚
客前極目江山何處是一帆萬里信歸船

送劉山人歸洞庭

李頻

去意無人會惟應道是從半湖乘早月中路入疎鐘
秋盡戶蠡急夜深山雨重當時將隱者分得幾株松

過洞庭湖

張喬

浪高風力大挂席一言遲及到堪憂處爭如未濟時
魚龍侵莫測雷雨動須疑此際情無賴何因寄所思

洞庭南館

張祐

一逕逗霜林朱欄遶碧岑地盤雲夢角山鎮洞庭心
樹白看烟起沙紅見日沉還因此悲屈惆悵又行吟

過洞庭

朱慶餘

帆掛狂風起茫茫既往時波濤如未息舟楫亦堪疑
遠雁投孤島長天下四維前程有平處誰敢與心期

春晚岳陽樓言懷二首

崔魯

烟花零落過清明異國光陰老客情雲夢夕陽愁裏
色洞庭春浪坐來聲天涯一與舊山別江上幾看芳
草生獨倚欄杆意難寫暮笳鳴咽調孤城

其二

翠烟如細柳如環時倚南樓獨看山江國草花三月
暮帝城塵夢一年閑虛舟尚嘆繁難解飛鳥空慚倦
未還何似不羈詹父件臥煙歌月老潺湲

夜過洞庭

殷堯藩

笙歌只解開花天誰是敲冰棹小船爲覓瀟湘幽隱
處夜深載月聽鳴泉

洞庭

胡曾

五月扁舟過洞庭魚龍吹浪水雲腥軒轅黃帝今何
在回首巴陵蘆葉青

秋日登岳陽樓晴望

張碧

三秋倚練飛金盞洞庭波定平如刻天高雲卷綠羅
低一點君山礙人眼漫漫萬頃鋪琉璃煙波闊遠無
鳥飛西南東北就無際直疑侵斷青天涯屈屈原日
牽愁吟龍宮感激致應沈賈生憔悴說不得茫茫烟
靄堆湖心

洞庭野望

宋陳與義

洞庭微雨後涼氣入綸巾水底歸雲亂蘆葦返照新
遙汀橫薄暮獨島渡長津兵甲無歸日江湖送老身
悠悠只倚杖悄悄自傷神天意蒼茫裏村醪亦醉人
連日風作洞庭不可渡出赤沙湖

范成大

金沙堆前風未平赤沙湖邊波不驚客行但逐安穩
去三十六灣浪痕生滄洲寒食春亦到荻芽深碧萋
萋青汨羅水飽動荆渚嶽麓雨來昏洞庭大荒無依
飛鳥絕天地惟有孤舟行慷慨悲歌續楚些髮髯幽
瑟迎湘靈黃昏慘淡艤極浦雖有漁舍無人聲各湖
落瀟此暫住春潦恐長隨傭耕吾生一葉寄萬木况
復搖落浮滄溟漁蟹尚有自常處羈官方汝尤飄零

洞庭湖

劉子澄

天孫歲晚會湘靈倒瀉銀河合洞庭上下天光惟一
白中間山色不多青荆潭萬里收塵滓宇宙連霄失

曉眠莫道人間少仙境詩思酒魄一時醒

元吳奎

洞庭遙在天之東放歌濯足秋正中君山倒蘸翠螺
濕湖水直與銀河通一點兩點沙島白千樹萬樹霜
葉紅美人娟娟隔秋水木目極萬里雙飛鴻

送鄭同夫歸豫章分題得洞庭湖

顧瑛

五湖秋水洞庭煙七十二峯秋插天神禹書藏林屋
裏仙人詩刻石屏前溫溫玉氣穿雲洞白白銀河瀉
瀑泉鴻鴈來時木葉下送君晨發楚江船

洞庭秋月

揭傒斯

浩氣自澄穆碧波還蕩漾應有凌風人吹笛君山上
軒后不張樂白月照野水冷冷水影中瑤瑟泣湘鬼

前題

陳旅

西風吹老洞庭波一夜湘江白髮多醉後不知天在
水滴船清夢壓星河

過洞庭

唐珙

帝里朝辭供奉班客程宵濟洞庭灣湘君鼓瑟清冷
外鮫女鳴機縹緲間青草波光連蔓澤蒼梧雲物隔
疑山故園亦有岷江水垂老生涯釣艇閒

洞庭春興

明楊慎

萬籟無聲玉宇清君山推出一輪明嬋娟倒蘸寒波
底驚起魚龍夢不成

前題

唐寅

洞庭湖上岳陽樓檻外波光接素秋數點征帆天際
落不知誰是五湖舟

過洞庭湖

馮世雍

楚客驅車過洞庭天風颯颯吹相靈斜陽欲盡亂山
碧別浦遠望飛烟青南荒征旆倚明月東郭草堂虛
翠屏浮槎萬里泛牛斗劍光白日秋空冥

送客遊洞庭湖 謝榛

相逢楚客問巴州此去揚帆湖上遊日月平臨洞庭
水煙霞半入岳陽樓低空白鴈投寒渚隔浦丹楓照
暮秋莫向湘君聽鼓瑟黃陵月冷不勝愁

洞庭湖中作 李東陽

湖南鉅郡稱岳陽樓前大湖春水長周廻九江帶七
澤顛倒萬象隨山光洪濤巨浪拍山動風雨却灑炎
天涼君山遠在湖中央蒼梧不來斷人腸南尋汨羅
不知處屈子隨地魂茫茫謝公弔古心慷慨予亦從
之渡沅湘平生壯遊天地間老大不覺鬢眉蒼商飈
南來振南嶽孤櫂未許還滄浪畫圖髮髯今皆足江
海風期殊未忘揮毫賦者誰最強前有引魁後孔囑
二子之名滿天下豪氣直欲隘八荒嗟予有辭不敢
吐人今盡笑二子在眼中同調似公少且復盡醉君
山傍

洞庭秋月 黎擴

湖上清秋夜扁舟泛碧波紫簫吹不斷無奈月明何
雨中過洞庭 王偁

昨夜南風起洞庭曉來湖上雨溟溟忽看天際鷺濤
白失却君山一點青

過洞庭賦得湖南清絕地 譚元春

岸青點點浮沮洳直看天日孤蒲去隨波流山山不
知鷗與前帆落何處輕舟二月桃源間有此奇奔無
此圓雲中相城不斷魂疎雨如秋涼萬山山水照耀

晨復昏南方自有湖岳尊人來其間亦如此孤懷落
落千餘里

登岳陽樓 汪濤

危欄高棟俯江餘覽勝難逢貫月槎天際遙連湖水
闊山形時帶彩雲迴吟看漁子歌中樂坐對寒流石
上沙四顧烟嵐直浩渺征帆落日影橫斜

洞庭阻風 許夢熊

湘陰之渚何曲曲宛轉盤旋三十六水性從來柔且
剛百折東之不迴顧北風吹浪洞庭野千艘連雲如
屋瓦慙余淹蹇待時來就中豈無速歸者去年中秋
月在家一輪五色天開花此夕歸舟載明月三五良
宵惜離別湘江主人贈我酒江頭問魚魚亦有醉來
只覺天地寬楓林楚水通長安人生利鈍那可期一
息千里須有時

洞庭秋月 無名氏

纖雲不動金波浮玉沙萬里開清秋青山一髮渺無
際天影落鏡星河流中流無人萬籟寂夜深往往魚
龍出何人長笛在扁舟水遠天長露華白

浪淘沙 洞庭秋月 明鍾世賢

霜落洞庭秋天闊雲收影搖孤月翠光流何處仙人
吹鐵笛黃鶴樓頭不洗古今愁只管清幽琉璃盤
裏水晶毬照徹君山千萬丈便是瀛洲

洞庭湖部選句

陳陰經渡青草湖詩洞庭春溜滿平湖錦帆張
唐張說巴丘春詩日出洞庭水春山掛斷霞又岳州
作朝遊洞庭上緬望京華絕

李白衡山詩回颺吹散五峰雪往往飛花落洞庭又
臨江王節士歌洞庭白波木葉稀燕鴻始入吳雲飛
馬戴夜入湘中詩洞庭人夜到孤棹入湘中

寄韓諫議詩濯足洞庭望八荒
程賀君山詩云是崑崙山頂石海風飄落洞庭湖
郎士元夜泊湘江詩湘山水落洞庭波

賈島送惠雅渡師歸玉泉詩祇到瀟湘地洞庭湖未
遊
張繼重經巴丘詩詩句亂隨青草落酒腸俱逐洞庭
寬

顧况嵇山道芬上人畫山水歌淥汗平鋪洞庭水
楊凝初次巴陵詩西江浪接洞庭波積水遙連天上
河

李羣玉寄短書歌翔鴈橫秋過洞庭西風落日浪呼
噪
溫庭筠贈少年詩江海相逢客恨多秋風葉下洞庭
波

袁皓過萍川題梵林寺詩瀘水東奔彭蠡浪萍川西
注洞庭波
顧在銘題光福上方塔詩汀沼或樓彭澤鴈樓臺深
貯洞庭風

徐鉉送楊郎中唐員外奉使湖南詩方舟齊泛洞庭
春

元傳若金漢江詩地雄縹緲連嶂天險微茫帶洞庭

明錢允治楚江秋晚詩揚帆指洞庭忽振若山松
王彥泓太湖詩包山湖達洞庭湖

楊基岳陽樓詩春色醉巴陵閣干落洞庭

邊貢鄂渚詩鄂渚維舟楫登高覽洞庭

歐陽明長沙別朱一詩江上孤舟對夕曛洞庭漠漠起寒雲

洞庭湖部紀事

地理通釋秦與荆人大戰大破荆襲郢取洞庭五湖江南

後漢書南蠻傳吳起相悼王南并蠻越遂有洞庭蒼梧

長沙府志洞庭老人不知何許人夷堅志云卓彥恭

嘗過洞庭月下有一小漁舟過其傍因呼問有魚否

應曰無魚有詩卓喜曰願聞一篇可乎老人鼓棹徐

去高吟曰八十滄浪一老翁蘆花江上水連空世間

多少乘除事良夜月明收釣筒欲邀之不可及也

北夢瑣言天祐中淮西圍武昌杜洪中令乞師于梁

主梁與荆方睦乃諷中令成汭帥兵救之汭欲親征

乃造巨艦一艘三年而成號曰和州戰艦上列廳宇

洎司局有司衙府之制又有齊山截海之名其餘華

壯可知也飾非拒諫斷自己意幕僚倖仰不措一詞

惟孔目官楊原贊成之舟次洞庭湖君山下吳師焚

之洩竟溺死兵士潰散先成改名曰汭即水內也湖

南及朗州軍入江陵俘載軍前睹掌伎巧僧道各官

並歸長沙成汭之名和州之說蓋前定矣

五代史楚世家唐莊宗滅梁楚馬殷遣其子希範修貢京師上梁所授都統印莊宗問洞庭廣狹希範對曰車駕南巡纔堪飲馬耳莊宗嘉之

宋史河渠志徽宗崇寧四年正月以倉部員外郎沈延嗣提舉開修青草洞庭直河

岳州府志建炎四年五月洞庭湖夜赤光東北互天如火明照湖心上一色俄轉東南此血徵也後寇兵犯湘沔

宋史五行志孝宗乾道七年十一月丁亥洞庭湖巨龍走沙擁舟身廣長皆丈餘升舟以首足壓重艦沒水

常德府志乾道七年十一月丁亥洞庭湖中有蚌大如半席深夜側立一殼乘風往來煙波間中吐大珠與月相射漁者百端取之終不可得

宋史張浚傳浚字德遠漢州綿竹人紹興五年除尚書右僕射同中書門下平章事務在塞門抑近習時巨寇楊么據洞庭屢攻不克浚以建康東南都會而洞庭據上流恐滋蔓為害請因盛夏乘其怠討之具奏請行至體陵釋邑囚數百皆楊么謀者給以文書俾招諭諸若囚驩呼而往至潭賊衆二十餘萬相繼來降湖寇盡平

元史世祖本紀至元十二年三月辛卯宋將高世傑會鄂復岳三州及上流諸軍戰船數千艘兵數萬人扼荊江口壬辰阿里海牙以軍屯於東岸世傑夜半遁去黎明至洞庭湖口兵船成列而陣阿里海牙督諸翼萬戶及水軍張瑄實汝梅等逐世傑於湖口

之夾灘

岳州府志元杜雲隱黃陂人洞庭湖廟祝也能知水面風波與人語輒驗江南湖北肅政廉訪伯顏上其事於朝至元十六年十月內勅封普惠廣化真人提調沿江諸廟事

東昌府志張繼妻郭氏棠邑人繼祖從平章阿里海牙征入桂卒于洞庭怒濤中郭絜子自長沙奔喪歸葬時年二十五即毀容自誓撫子震以至成立岳州府志順帝至正十五年羣鼠數十萬渡洞庭湖去四川

四川總志青文勝大寧人洪武間為龍陽典史邑賦凡三萬七千有奇濱于洞庭每苦水患民不能輸勝疏減凡三上不報遂經于登聞鼓下事聞於其誠切詔減賦二萬四千餘石民德之

岳州府志姚文灝字秀夫貴溪人成化甲辰進士為湖廣提學食事過洞庭舟淺危端坐不動風止泊舟登岳陽樓云來時行李蕭然去時行李蕭然岳陽樓下經過此心無愧蒼天

武宗正德八年岳州大雨雪洞庭冰合人騎可行南昌郡乘姜儀字君肅南昌人正德甲戌進士歷浙江右叅議湖廣郴桂兵備副使時洞庭寇盜充斥儀令漁艇悉為保甲捕賊而出己贖銀代為課輸賊起聽其艤舟而擊之寇之所有盡以賞其勞官司不問湖商賴之

辰州府志田成龍沅陵人以恩選領應天庚午鄉薦嫻於詩文好訪名勝嘗泛洞庭涉彭蠡探廬山武夷之奇

岳州府志嘉靖二十九年庚戌洞庭湖中有五龍並見

孫宜字仲可五歲知學稍長遊京師名甚著舉鄉貢屢試禮部不售年三十八上隱洞庭自稱漁人開園于居左攀蘿捫竹臨風放歌爲舉子三十年足不履公室博與靡弗通著有洞庭漁人集五十卷行世常德府志姚學閔字汝孝武陵人登隆慶辛未進士爲刑科給事中歷轉三垣多所建白時差役無定例以至民多流亡乃以戶科都給事中奏定一條編永爲良法改辰常沅軍餉以辰常各衛遠阻洞庭風浪

巨測永無漕運之役湖廣通志蕭時逢巴陵人萬曆戊子春洞庭風作舟覆積尸四十餘時逢悉棺葬之太守王濬題恩施不報四字旌其宅

潮州府志謝正蒙字中吉惠來人中萬曆戊子鄉試與鄒元標何喬遠諸公講求正學策仕安鄉知縣縣濱於洞庭湖正蒙至湖水不復爲患舉卓異

江寧府志萬曆三十七年有鼠從湖廣涉洞庭至揚子江晝伏夜行尾尾相銜渡水如履平土至岸即入人家在野則傷田禾

岳州府志嘉宗天啓元年辛酉岳州大雪自正月至二月終不絕平地積四五尺人畜樹木魚龜凍死無數洞庭凍結可行

寧海縣志胡獻來字子良號覺非太湖人天啓丁卯膺鄉薦冠本房戊辰捷南宮初授行人晉兵部典武選湖廣洞庭風波甚惡爲寇盜數公遷岳州兵備即疏請設兵船數十遇風連艘以鎮之遇盜連艘以擊

之而湖患乃克以息長沙府志吳雲龍號少湘湘陰人磊落好義赴人之急惟恐不贍曾貿易過洞庭見鄰舟將覆極力拯之活數十人盡所資以給道里費雖歸囊蕭然勿計也廣東通志郭榮字樂周南海人領辛酉鄉薦第六授岳州府同知岳州洞庭之墟荏苒曠莽禦防海十策置兵艦嚴哨捕上亟借箸地方賴以無警

衡州府志龐蘊字道元襄陽人隨父官衡陽因家焉少憎塵勞志求真締嘗侍父守衡日于城南拾宅爲能仁寺以舟載家貲宦囊盡沉諸洞庭往來一葉令所生男女習竹器以度糞瘞

湖廣通志畢應達衡陽人母湯氏感心疾殆甚達嘗糞覺味苦默禱願以身代因割股糞糜託言人參餌進之母疾頓起後達舟過洞庭風狂致覆溺望檣上有光如燭得抵岸免人以爲篤行之報

鄧孔符桂陽州人兄孔範疾劇符割臂療之事聞學使給以衣巾後過洞庭舟覆不溺至者齡乃終

洞庭湖部雜錄

戰國策吳起對王鍾曰昔者三苗之居左有彭蠡之波右有洞庭之水

淮南子江水之始出于岷山也可褰裳而越也及至乎下洞庭驚石城經丹徒起波濤舟航一日不能濟也

博物志吳左洞庭右彭蠡後漢長江岳陽風土記洞庭湖岸有石井二相去數百步俗號秦皇井其泉甚甘美

舟中有朱砂過洞庭多爲風濤所苦相傳以爲龍神所寶也載人柩者亦然近日扶柩過者往往少驚恐秋深洞庭水落島嶼皆露鰲聚魚所聚一夕風色便順則所得之魚厭厭鄰境湖上漁人有善沒者云洞庭相湖夏秋水漲深不過數十尺而荆口水深一二百尺窮冬洞庭湖水已退盡江湖寒洪在徒涉處得魚數百斤者而荆江魚重不過數十斤

北夢瑣言前輩許棠過洞庭詩最爲首出爾後無繼斯作詩僧齊己駐錫巴陵欲吟一首詩竟未得意有都押衙者蔡姓而忘其姓名戲謂己公曰題洞庭者某詩絕矣諸人幸勿措詞己公堅請口劄押衙吟曰可憐洞庭湖恰到三冬無髭鬚以其不成湖也諸僧大笑之

宋范仲淹岳陽樓記予觀夫巴陵勝狀在洞庭一湖衡遠山吞長江浩浩蕩蕩橫無際涯朝暉夕陰氣象萬千此則岳陽樓之大觀也前人之述備矣然則北通巫峽南極瀟湘遷客騷人多會于此覽物之情得無異乎若夫淫雨霏霏連月不開陰風怒號濁浪排空日星隱曜山岳潛形商旅不行檣傾楫摧薄暮冥冥虎嘯猿啼登斯樓也則有去國懷鄉憂謫畏謫滿目蕭然感極而悲者矣至若春和景明波瀾不驚上下天光一碧萬頃沙鷗翔集錦鱗游泳岸芷汀蘭都郁青青而或長烟一空皓月千里浮光耀金靜影沉璧漁歌互答此樂何極登斯樓也則有心曠神怡寵辱皆忘把酒臨風其喜洋洋者矣元周志德岳陽樓記夫岳陽樓以洞庭倍聲價而洞庭即以岳陽樓爲眉目洞庭跨楚地幾千里汪洋浩

綠天朗氣清之候徙倚盼望妍態橫生及狂飈忽起
崩浪拍空洶湧澎湃觀者驚心駭目然不足爲洞庭
病臂之金錫精純而寓鋒鏑也臂之圭璧溫潤而形
稜隅也臂之音樂清越而能鏗豁也臂之駿騁驕驕
調良馴服而能追風逐電也臂之蛟龍虎豹靜則隱
躍于淵潛伏于窟動則蟠翔于天踞嘯于山也臂之
名儒全才文則吐鳳生花武則摧堅陷陣也臂之王
朝典制喜則車馬衰藹無吝施怒則干戈矛刃無宿
誓也臂之大塊運度春溫則宇內皆飽其酥合煦嫵
秋肅則寰中皆承其慘淡栗烈也以正若彼以奇若
此湖之能事莫非樓之勝槩則作樓者之功豈淺鮮
故

洞庭湖部外編

湘川記君山有美酒飲者不死漢武帝遣樂巴求得
之未進御東方朔竊取帝怒欲殺之對曰使酒有驗
殺臣亦不死無驗安用酒爲帝笑而釋之

石柱岡在安鄉未寧村相傳有仙人一夜立石坊于
其地二柱將豎鷄鳴未成而去至今二柱鑿痕宛然
獨異志開元中燉煌李鶴爲邵州刺史挈家之任泛
洞庭時晴登岸因鼻血舐沙上爲江龜所舐俄與鶴
一其形體言語衣服不異鶴本形爲龜所繫於水中

其妻子家人隨龜就任州人亦不能覺爲郡數年因
天下大旱江西河沙道土葉靜能自浮山赴水朝過
洞庭忽見沙上一人面縛問曰君何爲者鶴以狀對
靜書一符帖巨石上石即飛起空中龜方擁案晨衙
爲巨石所擊乃復本形時張說爲岳州刺史具奏以
舟楫送鶴赴郡今舟行相戒不瀝鼻血于波中以此
故也

博異志賈客呂筠卿常於仲春夜泊舟君山命酒吹
笛數曲忽見一老父拏舟來于懷袖間出笛三管其
一大如合拱其次如常人所蓄其一絕小如細筆管
筠卿請吹之父老曰其大者諸天之樂不可發其次
對洞庭諸仙合樂而吹其小者是老身朋儕可樂者
試爲子吹之不知可終一曲否言畢抽笛吹三聲湖
上風動波濤混濤魚龜跳噴五聲六聲君山鳥獸叫
噪月色昏昧舟人大恐父老遂止乃歌曰湘中老人
讀黃老手援紫龜坐碧草春至不知湘水生日暮忘
却巴陵道遂棹舟去隱隱漸沒于波間

湘中志貞元中湘潭尉鄭德鄰家長沙有親表居江
夏歲往省每涉洞庭歷湘中時遇艤買韋生乘巨舟
同離鄂渚至洞庭之畔又同宿韋有女美而艷適于
水窻中垂釣德鄰見而悅之遂以紅綃一幅題詩曰
纖手垂釣對小窻紅葉秋色艷長江既能解珮投交
甫更有明珠乞一雙強以紅綃惹其鈎女以所得繫
臂自愛惜之明日乘風發舟風勢漸緊德鄰舟小不
敢發將暮有漁人語德鄰曰向發巨舟已全家沒于
洞庭矣德鄰大駭神思恍惚悲惋久之爲弔江妹二
首曰湖面狂風且莫吹浪花初綻月光微沉潛暗想

橫波淚得共鮫人相對垂洞庭風軟荻花秋新沒青
蛾細浪愁淚滴白蘋君不見月明江上有沙鷗詩成
醉而投之遂感水神持詣水府覽之謂同溺數輩曰
誰爲鄭生所愛有主者搜臂見紅綃語府君曰德鄰
異日是吾邑明宰不可不曲活爾命名主者攜韋氏
送鄭生韋氏視府君乃一老叟也隨主者疾趨道觀
一大池碧水汪然遂爲主者推墜其中或沉或浮夜
三更德鄰未寐忽見有物觸舟遂乘燭驚而拯之乃
章女也繫臂紅綃尚在德鄰喜駭良久女蘇息及曉
方能言乃說府君感君而活我命德鄰曰府君何人
也終不醒悟遂納爲室將歸長沙後三年德鄰當調
遷謀醴陵令章氏曰不過作巴陵耳德鄰曰子何以
知章氏曰昔水府君言君是吾邑明宰德鄰志之選
果得巴陵令

仙傳拾遺唐儀鳳中有儒生柳毅吳邑人也應舉赴
咸京下第歸至涇陽見一婦牧羊曰妾洞庭君小女
嫁涇川次子爲婢所惑得罪舅姑毀黜至此敢寄尺
牘于洞庭之陰有大橘樹君擊樹三當有應者毅如
言見千門萬戶曰靈虛殿一人取書進之君泣曰老
夫之罪使懦弱羅害言未畢有赤龍長萬丈露天而
去俄而祥風慶雲幢節玲瓏紅粧千百中有一人即
寄書者乃宴毅于碧雲宮辭去後再娶盧氏貌類龍
女曰余即洞庭君女涇上之辱君能救之茲奉閨房
束以爲好同歸洞庭莫知其終後人皆以爲水仙爲
立祠焉

龍城錄長安任中宣家素蓄寶鏡謂之飛精識者謂
是三代物後有八字僅可曉然近猶蒙云水銀陰精

百鍊成鏡詢所得云商山樵者石下得之後中宣南遊洞庭風濤洶湧因泊舟夢一道士赤衣乘龍指中宣言此鏡乃水府至寶出世有期今當歸我矣中宣因問姓氏但笑而不答持鏡而去夢迴亟視篋中已失所在

甘澤謠韋駟者明五音善長嘯自稱逸羣公子舉進士一不第便已曰男子四方之志豈屈節于風塵哉遊岳陽岳陽太守以親知見辟數月謝病去駟弟駮舟行溺洞庭駮乃水濱慟哭移舟湖神祠下欲焚其廟曰千金佑舟安穩獲濟吾弟窮倖乃罹此殃焉用爾廟爲忽于舟中假寐夢神人盛服來謁謂駮曰幽冥之途無枉殺者公先君昔爲城守方剛譴正鬼神避之撤淫祠甚多不當廢者有一二神上訴帝初不許固請十餘年乃許與後嗣一人謝一廢廟之主故公弟當之倘求爽不獲即我之過當令水工送屍湖上駮驚寤其事遽止遂命漁舟施釣緝果獲弟屍于岸是夕又夢神謝曰鬼神不異忿怒而畏果敢以其誠也君今果敢如是吾所以懷畏昔洞庭張樂是吾所司願以至音酬君厚德所冀觀咸池之節奏釋浮世之憂煩也忽覩金石羽籥鏗鏘騁甚歎異曲終乃寤

開寶中賈知微遇曾城夫人及二妃于洞庭歌曰黃陵廟前青草春黃陵女兒茜裙新輕舟短棹唱歌好水遠山長愁殺人歌畢而去

欽定古今圖書集成方輿彙編山川典

第二百九十九卷目錄

青草湖部彙考

考

青草湖部藝文

詩

渡青草湖

宿青草湖

湖中

題龍陽縣草青湖

庚申過青草湖

青草湖

青草湖部選句

青草湖部紀事

青草湖部外編

澧水部彙考

考

澧水部選句

沅水部彙考

考

澧水部彙考

考

澧水部藝文

詩

送朱十二赴澧水

澧水部雜錄

辰水部彙考

考

辰水部藝文

詩



辰溪曉泛

舟發辰溪

過辰溪

沅水部彙考

考

沅水部藝文

浮沅賦

沅水部藝文二

沅江漁者

沅江上晚晴

夜坐聽沅江水聲

沅水驛二首

沅江晚泊

沅水部選句

沅水部紀事

沅水部雜錄

山川典第二百九十九卷

青草湖部彙考

岳州之青草湖

青草湖在今湖廣岳州府巴陵縣城南北連洞庭南

接瀟湘東納汨羅之水綿延岳州長沙常德三府之

地潦則有滔天之勢涸則青草生焉其水下流入于

江

考

按荊州記巴陵南有青草湖周廻百里日月出沒其

明薛瑄

前人

何景明

明張時微

唐李羣玉

宋王廷珪

前人

明何景明

王守仁

中湖南有青草山因以爲名

按方輿勝覽湖北路岳州青草湖一名巴丘湖自昔

與洞庭並稱

按潛確類書青草湖一統志云一名巴丘湖每秋夏

水泛與洞庭爲一水涸則此湖先乾青草生焉今按

青草湖一名洞庭湖疑卽一水及考圖經所載湘陰

別有青草湖似不指此或云青草在金沙堆上上通

洞庭爲一湖也

按續文獻通考青草湖一名巴丘湖北連洞庭南接

瀟湘東納汨羅之水

按湖廣通志岳州府青草湖在巴陵縣城南一名巴

丘湖北連洞庭水涸則青草生焉

長沙府青草湖在湘陰縣城北一百里

按岳州府志巴陵縣青草湖一名巴丘湖一曰重湖

在洞庭之西與華容接壤舊志謂在洞庭南者非也

風土記云夏秋水泛與洞庭爲一水涸則此湖先乾

青草生焉杜甫詩洞庭猶在目青草續爲名

按長沙府志湘陰縣青草湖在縣城北一百里與洞

庭相連曰重湖旁有疊石山水落則見山足水溢與

洞庭爲一水經曰青草湖亦謂之青草山也或曰湖

北連洞庭東近疊石茭葦生焉故水涸則青青彌望

非青草湖之謂也

按常德府志青草湖在府城東北七十里紮紫山下

按江南通志安慶府望江縣青草湖在縣城東北四

十里

武昌湖在縣城東北三十里其水受著山鳳樓烏龍

匯馬頭蘆薪連青草達于江

漳湖在縣城東北六十里其水納白水受武昌青草仰張山焦城車門趨埭溝內達皖口入于江外達路灌口入于江

白土湖在青草之東其水受武昌司馬武洲趨漳湖達于江

青草湖部藝文

詩

陳陰鏗

洞庭春溜滿平湖錦帆張源水桃花色湘流杜若香穴去茅山近江連巫峽長帶天澄迴碧映日動浮光行舟逗遠樹度鳥息危檣滔滔不可測一葦詎能航

宿青草湖

唐杜甫

洞庭猶在目青草續爲名宿槩依農事郵籤報曉程寒冰爭倚薄雲月連微明湖雁雙雙起人來故北征

湖中

顧况

青草湖邊日色低黃茅嶂裏鷓鴣啼丈夫飄泊今如此一曲長歌楚水西

題龍陽縣青草湖

唐溫如

西風吹老洞庭波一夜湘君白髮多醉後不知天在水滿船清夢壓星河

庚申過青草湖

宋張杖

已越重湖險張帆勝順流雲藏野寺橫網開漁舟物色湖南好風霜歲晚謀未知荒歉後得似向來不

青草湖

明何之翥

洞庭八百總爲名青草稱湖若庶塲五月波濤共作漲天光水色辨難成

青草湖部選句

唐張志和漁歌青草湖中月正圓巴陵漁父櫂歌連張繼重經巴丘詩詩句亂隨青草落酒腸俱逐洞庭寬

李端寄廬山眞上人詩青草湖中看五老白雲山上宿雙林

譚用之送丁道士歸南中詩子陵山曉紅雲密青草湖平雪浪高

青草湖部紀事

宋史河渠志徽宗崇寧四年正月以倉部員外郎沈延嗣提舉開修青草洞庭直河

青草湖部外編

搜神後記臨淮公荀序字休元母華夫人憐愛過常年十歲從南歸歸青草湖時正帆風駛序出塞郭忽落水比得下帆已行數十里洪波森漫母撫膺遠望少頃見一掘頭船漁父以楫掉船如飛載序還之云送府君還荀後位至常伯長沙相故云府君也

澧水部彙考

禹貢江水所至之澧水

澧水源出今湖廣岳州府慈利縣西歷山流至石門縣會澧水又流至澧州合澧澧二水入于洞庭湖

考

按書經夏書禹貢岷山導江東別爲沱又東至于澧澧水名楚辭曰濯余佩今澧浦是澧亦爲水名水經澧水出武陵充縣西至長沙下雋縣西北入江

按山海經東山經葛山之首澧水出焉東流注于余澤其中多珠璣魚其狀如肺而有目六足有珠其味酸甘食之無毒

中山經雅山澧水出焉東流注于視水其中多大魚其上多美桑其下多苴多赤金今澧水出南陽按漢書地理志武陵郡充歷山澧水所出東至下傳入沅

按水經澧水出武陵充縣西歷山東過其縣南澧水自縣東逕臨澧零陽二縣故界水之南岸白石雙